

東

華

續

錄

臣王先謙敬編

臣周潤蕃恭校

秋七月乙亥朔再撥京倉米二千四百石展賑宛平縣災民○丙子上步詣社稷壇謝晴○吳熊光等奏藏養白號賊首王鎮賢得旨嘉獎○庚辰諭此案楊文仲強姦總麻服弟楊文榜之妻黃氏不從將黃氏戮傷身死刑部因例無明文卽照凡人強姦本婦立時殺死例定擬斬決但思該犯與楊文榜係總麻兄弟若同凡人一律定擬未免無所區別楊文仲著卽處斬梟示以昭炯戒並載入刑部則例○壬午以衡齡爲江西按察使由鑒道遷○癸未諭初彭齡參奏伊桑阿在黔省巡撫任內驕縱勒索各款一摺伊桑阿前任山西巡撫時卽有斥罷屬員之事是以伊丁憂回京後

皇考不復任以封疆因其尙無贓私劣蹟未予罷斥 命往新疆
辦事上年朕加恩更換回京念其在新疆辦事有年尙無貽誤擢
任刑部侍郎屢次召見伊亦自認從前任性姦暴頗知改悔詞色
諱似出真情朕以伊年齒增長且經此番磨鍊自應變化氣質
適貴州巡撫缺出卽加簡放初不料其甫經莅任故態復萌實出
情理之外本年夏聞伊桑阿辦理石峴苗匪一案據奏將黔楚首
夥要犯全行擒獲甚爲迅速當卽降旨將伊桑阿交部從優議敘
並特加恩賞嗣琅玕自滇到黔又復集兵進剿將上潮下潮逆巢
壘蕩全境肅清彼時朕猶以琅玕迹涉邀功不復予以甄敘近日
風聞伊桑阿勦辦苗匪僅在銅仁駐紮並未親至石峴軍營聞知
琅玕起身前來卽將常明等攻克石峴作爲親身前往裝點入奏
琅玕由鎮遠赴銅仁途次難民紛紛擁道哭訴琅玕復行帶兵進

勦是伊桑阿前次所奏竟係粉飾虛詞業經降旨令琅玕密行查奏如果屬實一面奏聞一面傳旨令伊桑阿來京候旨今據初彭齡所劾伊桑阿各款伊桑阿上年到黔沿途州縣供應不周卽肆口謾罵並有因州縣辦差拂意卽行撤回者又將黔撫衙門全行拆改添造並藉口扣繳養廉用度不足令各府幫貼等事是伊桑阿不但情性乖張毫無悛改而又加以縱恣勒索等事實屬負恩昧良心試思黔撫衙署若果坍塌不能居住巡撫琅玕到彼何以未見拆蓋乃伊桑阿初到黔省卽令府縣承辦添造房屋數十間用銀至六千餘兩之多並未發價非取之屬員而何至伊桑阿藉稱扣繳養廉令各府幫貼一節前此伊桑阿簡放巡撫時曾自請將養廉按年全行扣交朕恐其辦公竭蹙特加恩令其支領一半如尚不敷用度不妨奏明另行加恩乃伊桑阿竟授意各府令其幫

貼此與富綱之勒派屬員何異至管門家人索取屬員門包亦必交伊收用伊桑阿一經到黔卽如此任意苛索又何待將來營私敗檢貽累地方乎此而不嚴加懲治何以肅吏治而儆官邪伊桑阿著革職拏問其雲南巡撫員缺著孫曰秉調補卽馳驛赴滇接

印任事此案著交琅玕會同孫曰秉將初彭齡所劾各款提集應訊人證並見辦石峴苗匪飾詞入奏一併秉公嚴審定擬具奏○

以常明爲貴州巡撫百齡爲貴州布政使阿禮布爲浙江按察使

由山東濟
陳道遷○甲申增建貴州石峴苗地碉卡設屯千總一員並置

石峴汛撥松桃協守備上江協千總各一員兵三百名防守○召

高杞莫瞻萊回京命那彥寶巴甯阿堵築永定河漫口○撥廣東

藩庫兩淮運庫銀各二十萬兩備陝西軍需○勒保奏督同阿哈

保薛大烈痛勦徐逆各股生擒徐添壽王登高等得旨嘉獎賞還

二品頂帶花翎○乙酉命濬京師護城河以工代賑○丙戌禁各省官員私役違犯○己丑撥部庫及廣儲司庫銀各五十萬兩賄永定河工料○庚寅增右安門外賑米○壬辰撥內帑濬紫禁城內外及圓明園各河道○癸巳諭本年京師自六月初旬大雨連縣河水漲發直隸所屬各州縣民田廬舍多半被淹災祲示警朕心深爲兢惕當卽簡派卿員分路查勘諭令一面奏聞一面開賑節降諭旨分別蠲免錢糧截留漕米六十萬石動支庫項十萬兩交熊牧等酌量分撥急賑並於京城附近地方撥發銀錢米石設廠分給又令興工代賑以期安撫窮黎當此霪潦爲災百姓流離失所嗷嗷待哺儻不立時降旨發帑開倉多方拯救其過在朕若既有銀米而地方官經理不善以致惠不逮民則咎在臣下矣本日九卿等議駁御史胡鈞璜和諍條奏一摺胡鈞璜則謂令在京

王大臣官員及各廟宇鋪戶等分養災民和靜則奏京師限定賑期曉諭災民早回鄉里伊二人雖主見不同均以各州縣災黎來京就食者多餽餽過慮試思各州縣被災百姓如果紛紛赴京就賑必因州縣散賑或侵肥入己或假手吏胥從中冒濫有名無實致百姓不能存活棄家覓食否則人情莫不繁懲鄉土孰肯舍近圖遠假如京師辦賑並不認真則近者必致失所遠處災黎亦豈肯聞風踵至乎該御史等並未將如何辦賑之法悉心條奏其議均不可行和靜指內詞意尙無紕繆無庸置議至胡鈞瑣請將被水男婦發給京城內外廟宇及王公大臣官員鋪戶之殷實有力者如雇工之例各處分養則荒唐已甚此等被災男婦令其入廟居住必致男女溷淆若責令王公大臣官員等分撥叅養視如雇工災民必不樂從難保無別滋事端且以待賑之民下僕所俟與

犯屬發給功臣之家爲奴何異試問前代救荒之策有如此辦理者乎今該御史妄逞臆見以必不可行之事冒昧濱陳本應照九卿所請交部議處念其究係言官若因所奏失當遽予處分恐有奏事之責者因此心生疑懼緘默不言但似此識見庸陋亦難勝臺諫之狂胡鈞璜不必交部議處著斥退御史仍回本衙門以原官補用向來各部院衙門保送御史往往將年老才庸者列名塞責竟以風憲衙門爲投閒置散之地殊屬非是各堂官於屬員中優等出色者自必留於本衙門辦事但亦應將才具稍次明白有識之員慎選保送豈可令衰庸之輩忝居言職致陳奏多屬不經嗣後各衙門保送御史務須認真遴選勿得率意充數自干濫舉之咎○諭熊枚兇署督篆駐紮工次陳大文不日即可抵京熊枚俟陳大文接印後不必留工著卽周厯直隸辦賑各地方詳細查

勘如果地方官有實心辦賑民情甯帖者卽將該州縣存記以備升調儻有玩視災務將賑餉銀米侵牟入己卽當奏明正法卽無侵牟之事或任聽吏胥中飽致小民不得實惠一經查訪得實亦應嚴參懲治此事專交熊枚查辦儻稍有徇隱咎無旁貸○乙未展賑五城災民一月○免順天府甯河等四州縣額賦薊州明年額賦十分之三直隸天津等二十四州縣額賦青縣等九州縣額賦十分之五○丙申撥廣東藩庫兩淮運庫銀各二十萬兩備四川軍需○戊戌予熱河被水災民口糧○撥山西藩庫銀六十萬兩山東河南藩庫銀各三十萬兩賑甘肅旱災○己亥調和甯爲戶部左侍郎那彥寶爲工部左侍郎高杞爲兵部左侍郎由戶左調○調蔣日綸爲工部右侍郎管錢法堂事劉躍雲爲工部左侍郎莫瞻萊爲禮部左侍郎由工右調○辛丑命山東採買米麥十萬石河南

採買小米五萬石備直隸明年平糶○壬寅展賑永定右安門外
災民一月○移陝西固原提督駐漢中府改協標都司爲城守設
提標五營

八月丙午以初彭齡署吏部右侍郎○戊申 上御經筵○己酉

諭前因風聞伊桑阿辦理石峴苗匪一案並未親到軍營督辦僅
在銅仁駐劄將常明等攻克石峴作爲親身前往裝點入奏曾降
旨諭令琅玕將伊桑阿辦理草率虛詞入奏之處據實查奏彼時
伊桑阿在黔省巡撫任內驕縱勒索各款尙未敗露嗣據初彭齡
參奏伊桑阿種種劣蹟大半係琅玕告知之語復降旨交琅玕會
同孫曰秉嚴審定擬具奏乃木日琅玕覆奏前次諭旨一摺不但
不將伊桑阿劣蹟舉劾而於伊桑阿未曾親往石峴飾詞具奏之
處轉代爲申說據稱伊桑阿因辦理撫恤難民留駐銅仁及將欲

親往軍營而常明已將爲首各犯擒獲伊桑阿卽據以入奏並稱此事係伊桑阿節次督催俾得及早成功與有應欺飾者情稍有聞是何言耶伊桑阿旣駐紮銅仁辦理撫恤事宜未經親往石峴軍營卽當據實奏明况石峴餘匪並未勦淨伊桑阿竟敢捏稱親往該處督辦將獲犯底事緣由徑行馳奏是伊桑阿欺飾之罪已屬百喙難辭而琅玕又復代爲隱飾此誠何心且伊桑阿在黔劣款前初彭齡參奏摺內據稱係琅玕自銅仁回滇時在郎岱地方與初彭齡會晤告知琅玕既可告知僚友獨不可直陳於君上之前乎此案若非初彭齡據實奏聞則伊桑阿貪獵營私貽累地方琅玕竟置之不顧以滿洲大臣且係覺羅又經朕詢問曾不若業經離任之漢巡撫尙能秉正不阿據實參奏乎看來琅玕總因伊桑阿前在新疆時參奏伊家人私販玉石一事意存避嫌卽屬徇

私代爲容隱而摺內所稱懷畏悚懼等語皆係敷衍虛詞全不足信矣此次琅玕如果將伊桑阿劣款及辦理苗案欺飾實情一一參劾則前此勦洗石峴苗寨後其攻克上潮下潮逆巢全境肅清皆屬琅玕之功所有伊桑阿前得優敘朕必移給琅玕今如此有心徇庇不但無功可錄並當立予罷斥姑從寬將琅玕拔去花翎降爲二品頂帶暫留雲貴總督之任仍著嚴行申飭以觀後效儻琅玕於查審伊桑阿貪劣各款仍有不實不盡必當嚴加治罪不能再爲寬貸也○撥部庫及兩淮銀一百五十萬兩於直隸備賑○撥湖南米三萬九千石備陝西軍糧○癸丑緩徵長蘆鹽課十分之五及直隸河南各引地課銀○甲寅諭御史王蘇奏新放江蘇學政平恕請另行簡放或酌量改調一摺內稱平恕前在江蘇斥革生員多名人人切齒卽商賈小民無不痛恨似平恕實有不

公不法之處因令軍機大臣傳到王蘇詢以平恕有無別項劣蹟令其據實直陳旋據王蘇登覆仍不過稱平恕辦理甄輔廷擅責主員一案眾心不服又稱平恕考試生童並無別項劣蹟等語平恕前在江蘇學政任內如果有賄賣生員去取不公等弊該御史當指明據實參奏朕必嚴爲懲辦至其因甄輔廷案內斥革生員多名一事先經照部議鑄職今該御史以業經議結之案仍列彈章並稱或另請簡放或酌量更調試思平恕如不勝學政之任既不宜於江蘇豈復宜於他省若平日並無劣蹟此次復經簡用益當顧惜聲名用息浮議固不肯苛刻以斂怨亦不應冤縱以沽名儻平恕約束士子仍不得當或另有案據亦何難將平恕罷斥治罪豈有國家簡任學臣因籍隸本省之御史摭拾前事一經劾奏卽行更換是舉錯之權操之言路勢必如明季科道紛紛訐奏惡

習成何政體乎所有江蘇學政仍著平恕去御史王蘇著交部議處○釋遣戍伊犁已革巡撫秦承恩命來京候旨○乙卯命編輯辛酉工賑紀事○除浙江海島遷移民戶棄地額賦○丙辰撥江西藩庫銀三十萬兩備四川軍需○以多慶爲內閣學士由太僕寺卿遷丁巳命五城所屬災民向不列入大興宛平戶口冊者歸順天府一體予賑○額勒登保奏生擒首逆王士虎冉添泗等勒保奏七十五一路官兵在桑樹坪獲劉朝選弟劉清選湯思蛟弟湯步武均得旨獎賚○戊午撥內庫銀一千兩分賞永定右安門外收養災民各廟僧道○庚申命採買奉天米石備直隸明年平糶○甲子勒保奏分派鎮將殲勦高魏股匪生擒首逆冉學勝等得旨獎賚賞還一品頂帶封三等男爵○乙丑 孝淑皇后升祔 奉先殿命 皇次子行禮○以三省大功將歲撤盛京兵歸伍○己

已以汪日章爲江甯布政使

由大理寺少卿遷

○癸酉諭前據經略額勒

登保參贊德榜泰先後參奏倭什布在巡撫任內辦理糧餉種種

貽誤以致官兵等勒索百姓搶掠糧食並聞於賑濟飢民一事張

大其詞多有不實又補放官員有伊家人與辦事屬員通同舞弊

各等語當經降旨將倭什布革職拏問解京交軍機大臣會同刑

部嚴訊倭什布逐條登答惟自認辦理不善其餘堅不承認是以

節次降旨交吳熊光詳查具奏茲據吳熊光奏查明倭什布款蹟

一摺朕詳加披閱如楚省兵丁追勦竄匪分合無定倭什布運送

餉銀不能設法趕運積有尾欠其支給滿漢各營餉項並不照經

略等酌定章程辦理所給未免浮多並於製備軍裝軍火等事不

知緩急致形缺乏又上年所截漕糧原以備兵米之用倭什布並

不運送襄郎轉解房竹迨大兵入境倉卒趕運多糜腳價仍復緩

不濟急又上年倭什布奏報鄖縣難民二十餘萬內有各回本籍
民人並非全係待賑之人倭什布並不分別查察率行入奏實屬
張大其詞以上各款尙無貪婪骯法及縱容家人舞弊之處其經
理軍需不能妥協以致多有貽誤並於飢民數目奏報不實自當
治以應得之罪著軍機大臣會同刑部卽查照吳熊光摺內所列
款蹟將倭什布按例定擬具奏尋議請將倭什布發往軍臺效力
得旨賞倭什布七品筆帖式頂帶發交陸有仁令充當苦差○撥
江西廣東藩庫銀各二十萬兩備陝西軍需○予故休致刑部尙
書梁肯堂祭

九月乙亥朔召達慶來京調和甯爲倉場侍郎英和爲戶部左侍
郎扎郎阿爲禮部左侍郎以恩普爲禮部右侍郎由左副都御史遷○甲
申上閣健銳營兵○左都御史馮光熊卒予祭○以熊枚爲左

都御史轉祖之望爲刑部左侍郎以初彭齡爲刑部右侍郎○乙丑命續修大清會典○甲午諭軍機大臣等此時額勒登保已帶兵前往川北一帶該處尙有李彬等股分竄勒保已馳赴川東惟賊匪雖已截回川境仍恐其乘閒折回目前陝境防堵最關緊要慶成係陝省提督大員自應在陝堵勦不必令其赴川此路陝省邊界一切防堵事宜卽責成慶成慶溝實力防堵○乙未永定河二十三號壩工合龍○戊戌諭本日明安奏前赴馬家堡查勘汕塌民舍情形一摺該處因永定河二十三號壩工堵合後大溜全注北上頭工水勢湍激衝山村舍明安已派參將奇成額將馬家堡迤西淤灘一段趕緊挑空俾水勢宣洩歸河所辦本是朕披閱時已依議發下而本日召見諸臣內未及明安旋據奏事太監王進福奏稱明安遞摺時向伊告知若本日未蒙召見卽代奏稱伊

尙有圖據進呈等語此不過欲請面對耳明安既有圖據何難隨
摺呈遞伊前此曾因奏事將圖據另置懷中於召對時呈出非止
一次本日未經召見之前豫屬奏事太監臨時代爲陳奏是明安
之意必欲朕召伊獨對而後已此誠何心豈非以和珅自居乎朕
每日召見臣僚多至十餘人諮詢利弊講求政治從不稍形厭倦
而惟於自請獨對一事力爲杜絕者蓋因請見之算不可勝數雖
所奏亦不過尋常事件而即可藉此以炫其眷注之隆甚且飾詞
誇耀捏稱在上前無不可進之言遂至無識之徒爲其所愚爭相
趨奉勢焰熏灼賄賂盈門皆由於此從前和珅福長安柄用其初
亦尙知小心後因該班獨對習以爲常漸致納賄營私無所不至
朕在青宮時卽洞悉此弊是以親政後將該班召見晚面槩行停
止並節次降旨嚴禁大臣等不得自請獨對明安爾不知之乃竟

敢於朕前巧爲嘗試乎至向來各衙門陳奏事件俱由外奏事呈遞惟軍機處內務府奏摺徑交內奏事進呈明安雖在御前行走而本日所奏挑空馬家堡汎灘係步軍統領衙門之事自應交外奏事接遞乃直交奏事太監並將所懷圖據豫行屬託代奏意在請見邀榮藉以炫耀此風斷不可長明安見係步軍統領本任之事較繁不能時常趨直見又有獲咎之處著退出御前乾清門專辨步軍統領衙門及本管各事件仍交兵部議處以爲希冀獨對有心取巧者戒此係朕防微杜漸爲國家成就人才至意乃明安之福不至如和珅之潰敗決裂也奏事太監王進福於不應接收之摺冒昧呈遞又代爲陳奏圖據亦屬不合著交軍機大臣議罪○己亥以河南召募練兵增設副將參將遊擊都司守備千總把總官○庚子諭慶傑等奏查勘銅苗情形一摺前據明安等奏大

興縣民人張士恆等呈稱平泉州屬四道薄雲梯溝等處有銅苗
透出請自備工本開採等語朕卽知其事不可行又涉言利是以
未卽允准特降旨令慶傑等查奏茲據慶傑等奏稱查得雲梯溝
地方係喀喇沁王滿珠巴咱爾名下山場舊有洞口四座係民人
竊空該處銅苗甚覺微細又四道溝地方舊有洞口一座亦係民
人竊空該處銅苗較旺但不知能否經久請令試採等語該二處
山場久經封禁見在詳悉查勘亦未見實有可以開採之處其事
斷不可行蓋開採俱係無業游民攢湊資本互相邀集趨利若驚
儻已聚集多人而銅苗漸竭彼時何以遣散豈不慮其滋生事端
卽或開採獲利而該處地方與蒙古山場相連使蒙古等處內地
官民專爲牟利起見於國體殊有關繫况見在戶工二部鼓鑄事
宜需用銅斤照例由滇省起解運京儘屬充裕本無須另籌開採

何必輕爲此舉耶所有平泉州屬四道溝雲梯溝等處產銅山場
新舊洞口俱著永遠封禁不准開採並責成地方官嚴加查察毋
許再有私行偷空之事朕自親政以來屢經諭止臣工不准言利
而內外臣工實心確信朕言者固多然心存觀望猶豫者不少彼
意總以爲決不因言利獲咎卽蒙議處申飭聖意總覺能事後必
見好是直不以朕爲賢君視爲好貨之主矣諸臣何苦必欲以此
嘗試耶上年胡季堂有奏請在直隸大名地方開設鉛廠一摺朕
未經批發查勘卽不准行本年明安先有奏請開採木植之事此
次又率據該商人所請奏開銅礦謂非言利而何在商民等無知
見小計及錙銖而明安卽據以入奏此必輕聽屬貞慾過而成明
安受恩深重自不應有冀圖沾潤情事然亦不可不防其漸而該
商等具呈懇請時若非於所屬員弁及書吏人等展轉賄求何能

遂將所請之事達於明安代爲奏請此種情弊豈能逃朕洞鑒乎
嗣後臣工等惟當洗心涤慮毋得輕啓利端假公濟私妄行瀆奏
將此旨通諭中外知之○定管理戶部三庫事務大臣按年更換
例○以萬甯爲左副都御史由通政使遷○王寅諭兵部議處明安請
照違制例革職一摺朕簡用臣工惟視才具之優否初不猥設成
見其年齒老成諳練庶務者自堪倚任而少年明幹者亦未嘗不
因材錄用以試其能如果始終勤奮辦事實心則年力方富效用
之日正長國家更可久資得力豈不甚善卽如明安從前在御前
乾清門行走時朕見其差使尙勤小心謹慎是以於布彥達齊病
故之後出有步軍統領員缺特加恩將明安補授明安接任以來
於本衙門事務亦尙能照常辦理惟少年喜事頗露高興日前曾
經奏請開採木植啓空銅苗等事皆涉於言利輕聽屬員怨讐違

不如布彥達齊之安詳鎮靜昨又於陳奏挑空馬家堡淤灘摺件
將所懷圖樣豫屬奏事太監代奏意在請見得邀獨對以炫其眷
注之隆穎違節次嚴禁請見諭旨卽照部議革職亦屬咎所應得
姑念明安所得公爵原係世襲而於管理步軍統領諸務尙無貽
誤著加恩賞留公爵兼管步軍統領衙門及上駕院事務仍帶革
職留任其所管正紅旗蒙古都統及三山暢春園火藥局崇文門
稅務總理工程處嚮導處盡行革退開缺另行簡放以爲大臣輕
率取巧者戒

冬十月甲辰朔諭昨日御史張鵬展奏光祿寺少卿金光悌辦理
秋審錯至九十餘案不應留部當卽降旨令刑部堂官明白回奏
茲據董誥等奏稱金光悌在部有年升任時正值覈辦秋審緊要
之際是以奏請留部並非該員干求懇棧至本年秋審案件並無

錯誤惟總辦處看出廣東省黃冊疏漏錯落九十餘處俱經鑄改
繕正等語刑部爲刑名總匯之區若覈辦秋獄事務錯誤至九十
餘案之多則總辦之員自難辭疏率之咎今旣查明係原辦司員
字畫錯誤經總辦處看出業經該堂官將承辦各員記大過一次
已足示儆至金光悌在部年久該堂官懇請留部雖係爲熟手起
見但平時廷臣中有在朕前論及金光悌大率毀多譽少而朕於
召見時留心察看金光悌應對未能明晰亦並非出色之員刑部
司員爲數不少其中豈無一二明白諳悉律例之人可以接辦者
乎况司員升至京堂例不兼部行走縱暫時奏留迨漸次升擢總
須出部卽如章煦升任大理寺少卿軍機大臣奏稱不應兼軍機
章京上行走經朕因軍務將竣降旨該員暫留樞直乃係特恩若
此後各部人員遇有升任京堂者該堂官紛紛效尤奏請留部豈

竟一槩准行耶光祿寺少卿金光悌著回本衙門供職不必兼部行走○以方維甸爲河南布政使策丹爲山東按察使

由運河道遼

○

丙午諭據吉慶瑚圖禮謝啓昆奏粵東省公捐銀三萬兩粵西省公捐銀二萬兩以備凱旋賞賚之用等語所奏甚屬紕繆教匪滋事以來節次派調東三省各省官兵分投勦辦所以除莠安良俾黎元均臻甯謐年來籌備軍需所發餉銀已不下萬萬動撥帑項曾不少爲靳惜卽由外省支發者亦均屬應行解京款項初不因軍興需用浩繁稍有累及民間各省地方大吏自所深悉此時大功將次告成其凱旋賞犒需費幾何何待外省捐貲備用况朕屢經降旨嚴諭內外臣工不得稍涉言利蓋深有鑒於利國之事多係病民卽目前暫聞捐例亦係不得已之舉見在工賬已畢軍務指日完竣卽當飭諭停止朕躬行節儉爲天下先惟有休養生息

以期百姓康阜元氣日復漸臻上理焉有因年來度支繁費設法
科斂以裨國用之理損下益上之舉朕斷不爲百姓猶朕之子焉
忍剝削乃朕諄諄誥誠至再至三而吉慶等猶不確信朕言竟思
巧爲嘗試是直不以朕爲賢君視爲好貨之主矣非孟子所謂不
敬莫大乎是耶且伊等借此捐輸之名派及兩省督撫司道勢必
取之各府州縣各府州縣勢必取之百姓層層派累仍不過剝削
閭閻所謂捐輸者初非出自己貲其名爲捐銀五萬而攤派之項
諒不止此種種情形豈能逃朕洞鑒似此藉詞聚斂不特以小人
之腹度君子之心意圖見好而其假公濟私巧爲自肥之計是於
言利之中尤爲卑鄙不足道者也此端一開各省紛紛效尤成何
政體吉慶瑚圖禮謝啓昆顥違前旨本應交部治罪惟念伊等三
人素日辦事尙知認真姑從寬免付吏議著傳旨嚴行申飭以觀

後效此項銀兩若尙未措辦卽著停止儻已收齊亦卽按每名下所出銀數全行發還該督等接奉此旨有將公捐之項勒捐不還經朕訪聞或被人呈告必將伊等按例治罪若地方官因此科派百姓卽據實參辦儻伊等徇隱不奏一經查出一併從嚴懲治決不寬貸將此通諭知之○諭軍機大臣等台布奏籌辦河南河北事宜一摺內稱蒙古強實爲中國之患蒙古弱乃爲中國之福以番制蒙誠爲良策數語甚屬錯謬我朝開國以來蒙古隸我臣僕重以嫡聯爲一體青海地方蒙古雖非內外扎薩克可比亦不應稍有歧視雍正年間於該處設立辦事大臣本爲保護蒙古起見誠以番族雜居蒙古之外而蒙古實爲中國屏藩是以蒙制番則可以番制蒙則屬倒置矣設台布此語經蒙古人聞之豈不因而解體乎近因青海蒙古不能自强屢經降旨令其大加振作原

欲使知激勵焉有番眾漸強轉聽其脅制蒙古之理台布從前會在軍機處行走有年何不曉事體至此著傳旨申飭至勘定卡倫地方畫定界址不准番眾擅入蒙古擅出所見尙是惟番眾賦性蠢頑止當嚴加飭禁勿令入卡使之知所畏懼不必曲爲勸諭其蒙古等亦各隨時曉示不得擅行出卡儻有不肖之徒勾引番賊入卡偷竊者必當嚴辦以示懲儆再署同知姜有望素爲番眾信服前此帶領同往之番民尖木贊業經賞給花翎姜有望亦著一體加恩賞戴用示獎勵卽責令該員妥爲安撫俾番眾永臻安帖不至搶奪滋事爲要○永定河漫工合龍○調陳鍾琛爲山東按察使策丹爲河南按察使○癸丑額勒登保奏生擒首逆辛斗僞總兵蘇啟志得旨嘉獎○乙卯撥廣東藩庫銀二十萬兩備湖北軍需○撥江西藩庫銀十一萬兩於陝西備賑○丁巳諭據左右

翼前鋒統領等奏稱於本年十月十五日起率領各章京護軍等照例演習步圍等語我朝定鼎之初城外左近地方尙未徧行開墾猶有禽獸棲止是以曾派官兵演習步圍藉以肄武今承平日久城外左近俱已耕種田畝並無長林豐草安有禽獸若仍派官兵行圍不過虛應故事而已朕綜理庶政惟在崇實不尚虛文各大臣俱宜實心實力督率該管兵丁按時操演以臻精銳何必務此虛文若拘泥定例演習步圍轉誤兵丁操練尤爲不可將此傳諭該管大臣等嗣後各營演習步圍一事著永遠停止○德楞泰奏殲斃首逆龍紹周全股肱蕩得旨獎賚下部議敍○癸亥諭額勒登保於嘉慶元年冬間攻克湖南平隴賊巢曾經賞給俟爵並雙眼花翎二年春間苗疆事竣帶兵前往湖北因勦辦教匪遲延革去俟爵授爲伯爵又因擒捕首逆覃加耀辦理遲緩革去伯爵

及領侍衛內大臣都統後復授爲經略大臣又因屢次殲擒首逆
令添祿阮正漋龐洪勝伍金柱王廷詔高三馬五節經加恩復予
優擢遞封二等子爵賞遠雙眼花翎數年以來所至之處身先士
卒調度有方楊遇春等節次生獲渠魁皆係額勒登保分出兵力
調遣合宜故能所向克捷將十餘萬之賊殲除殆盡所餘僅十分
之一見在川北地方惟李彬一股夥匪尙有二千餘人較之從前
擒獲各首逆股內人數亦相去懸絕目下額勒登保復帶兵前往
通江一帶奮力截勦卽日定可殲淨其另摺所奏軍務戡定情形
及搜捕餘匪辦理善後各事宜皆與朕每日指示軍機大臣等意
旨不謀而合具見額勒登保胸有把握籌畫全局悉中肯綮深堪
嘉獎額勒登保加恩賚封三等伯並賞給黃面貂皮馬褂一件俟
李彬一股勦盡後再加懋賞德楞泰亦因平苗歲功賞給子爵雙

眼花翎嗣勦辦教匪在穀城殺賊千餘復賞用紫纲旋因追勦齊
王氏姚之富等未能迅速將伊所得世職花翎紫纲革去自嘉慶
四年以後節次殲擒首逆冉文傳高均德楊開第徐國謨等而其
功績最著者尤在截勦偷渡嘉陵江股匪生擒首逆冉添元保全
川西數百萬生靈至今該處民人無不感頌疊次加恩復遞封爲
一等子賞還雙眼花翎本年又將徐添德龍紹周兩股剿賊全行
殲滅厥功甚偉著加恩晉封二等伯並賞給黃面貂皮馬褂一件
此時川東惟湯劉二逆尚有二千餘人德楞泰見由夔州入山迎
擊勒保兩面夾勦即可盡數埽除俟湯劉股匪辦理完竣再當加
恩優獎賽沖阿溫春在德楞泰一路帶兵勦賊凡德楞泰所得之
功伊二人俱協同出力雖疊次仰邀恩賞交部議敘尙未得有世
職此次殲斃龍紹周係伊二人帶兵勦辦賽沖阿著加恩賞騎都

尉世職並賞給海龍馬褂一件溫春著賞雲騎尉世職並賞給黃面烏雲貂皮馬褂一件以示獎勵至軍機大臣慶桂董誥戴衢亨數年以來承旨書諭尙能周到勤勉著加恩交部從優議敘成德本年甫令在軍機處行走亦著加恩交部議敘軍機章京章煦自勦辦教匪以來所有軍營事件係一手繕辦是以節次加恩升擢昨因升用大理寺少卿軍機大臣奏明不應在軍機章京上行走特降旨暫留並著加恩交部從優議敘其餘出力章京著慶桂等擇其尤爲勤慎者奏明交部議敘○甲子予近畿災民棉衣○乙丑諭軍機大臣等本日吉慶奏事摺內另片密奏大功指日告竣善後事宜正需經費粵東存貯司庫明年買穀銀兩可以撥銀二十萬兩解京備用等語所奏大屬非是各州縣額設穀石均應實貯在倉偶因歲歉平糶出借等項動用卽應採買補還其有適值

糧價昂貴之時不能按時採買恐州縣將買穀銀兩虧短那移是以提貯司庫已屬權宜之計一遇豐收年分立當買補足數不容稍有缺額是廣東省司庫所存穀價卽與各州縣倉穀無異並非羨餘款項可以那動且據該督稱本年穀石已經採買遍倉尚有明年買穀銀兩此卽明年必動用之項斷無任聽州縣倉貯空虛不行買補之理若穀價俱已解京則來歲買補穀石又將動用何項勢必勒令州縣設法採買而州縣勢必苛派閭閻成何事體況粵東係海疆要地倉儲尤應充裕以期緩急足恃見在大功指日告竣辦理善後事宜卽需費孔多亦豈肯沾沾言利爲此移東補西之計况該省七次提解各款已有數百萬今又率將粵省應行存貯銀款解京在該督那移措辦即可保其無假公肥己之意而屬員奉行不善其弊伊於胡底豈欲括盡粵省民間脂膏而後已

耶至所稱見開河工捐例未知上捐是否踊躍懇請密示尤可不必其意不過以新例報捐如不甚踊躍又將奏請在粵省捐封捐職耳前因直隸被災較重工賑浩繁暫開捐例原屬不得已之舉自開例以來報捐人員已屬不少見在永定河決口業已合龍大賑見經開放窮黎餉口有資極爲安靜俟工賑事畢即應停止捐例更無須覩覩計及吉慶惟當將該省應辦各事宜認真經理能使洋面肅清吏治整飭卽屬盡職不必爲此出位之思也○內寅諭軍機大臣等英善福甯奏接據哲孟雄來稟當卽籌度檄諭緣由一摺內稱廓爾喀喇特納巴都爾與噶莫等不和借披楞之兵與廓爾喀打仗等語此係伊等家事原可置之不問至哲孟雄係邊外小部落從前曾被廓爾喀侵占地方今見伊境內彼此構釁欲乘閒借端復奪侵地故以通好爲名探聽消息並恐該處不令

入境希冀倚仗天朝聲威檄諭廓爾喀以遂其詭計至火藥係內地操演兵丁之用尤不應擅行請給英善等接到來稟卽嚴切飭駁諭令該部長自爲酌量各守地方和睦鄰封所辦甚是惟當飭邊界漢番官處以鎮靜嚴密防守毋令滋生釁端爲要篤哲孟雄再行瀆請仍應嚴行駁斥至廓爾喀境內構釁緣由總不必過問如續得該處爭鬭情形仍卽行具奏○己巳諭荆道乾奏近因胸氣喘逆精神驟形委頓恐致誤公請解任調理一摺荆道乾官聲素好自簡任封疆辦理地方公事均屬妥協今年老患病著准其解任或回山西本籍或卽在江省就近調理俟病痊來京另候簡用所遺安徽巡撫員缺著和甯補授卽行來京請訓速赴新任其倉場侍郎員缺仍著達慶補授達慶前任倉場時於辦理公務尙屬認真惟因各幫糧船挂欠漕米一節鄒炳泰以查覈挂欠爲重

達慶以料理回空爲急以致意見齟齬均爲公事起見並非因私
忿爭是以令達慶來京卽命其署理禮部侍郎並授副都統茲復
用爲倉場侍郎務當與鄒炳泰彼此和衷期於漕政有裨儒仍各
懷意見有心執拗或致誤公則自取罪戾必富嚴行懲治其達慶
所遺右翼稅務著瑚圖靈阿管理○庚午免順天府積水未涸之
文安縣明年額賦○壬申諭軍機大臣等慶成奏生擒楊開甲之
子楊驥生及僞先鋒張文喜等所辦甚好此股賊匪並首逆姓名
向來總未據各軍營提過又據稱張魏兩小股先後東遁又西鄉
一帶有兩股不知姓名零匪向西竄來可見川陝交界地方此等
素未知名匿匪尙多慶成係專派在陝境西北一帶防堵之員若
必待賊竄近始行勦辦則此股甫淨他股又來何時始能辦竣惟
當隨時偵探何處有賊藏匿或分派將弁前往搜捕或親往督勦

使該匪等不能潛身山內以期搜捕淨盡至所稱接到慶博來信
探聞忽有賊匪一二百人由老林突出向西逃竄慶博永明各帶
兵勇前往追捕一節此股賊匪雖止一二百人但向黑河一帶奔
竄距甘肅地界不遠儻任其竄入甘境又形散漫慶成當知會慶
博永明等務將此股賊匪截回陝境迅速殄除至此股零匪係從
何處汛地衝出向西逃竄著慶成將防卡疏縱之員查明一併具
報經略叅奏

十一月甲戌朔加賞五城賑米○乙亥諭御史鄭敏行奏請定觸
犯父母發遣人犯不准援救之例一摺此等匪犯向例皆不准援
救嗣於乾隆六十年查辦發遣人犯欽奉 皇考高宗純皇帝特
旨如查詢伊祖父母父母願令其回籍者卽准釋回敬繹 聖意
子孫違犯教令其祖父母父母送官發遣或係出於一時氣忿及

至子孫遠戍後未必不心存繫念是以 皇考特諭有仍願子孫
回家者准其援赦係曲體天下爲祖父母父母者之心並非於曾
犯忤逆之人稍有寬宥自當永遠遵行乃該御史摺內稱彼時

皇考因次年卽值歸政之期法外施仁尤屬措詞失體我 皇考
矜慎庶獄六十年如一日此事特溥如 天之仁推而至於庶民
愛子之至情與歸政何涉該御史輒冒昧摭陳乎至該御史旣知
以孝治天下豈有 皇考欽定例條輕言更易之理所有觸犯父
母發遣人犯如遇恩赦傳詢各犯祖父母父母有願伊子孫回家
者仍欽遵 皇考諭旨准其釋回以符孝治天下之義儻赦回後
再有忤逆情形一經呈告卽當加倍治罪至前定父母已故准令
釋回條例彼時軍機大臣等所議原未允協忤逆發遣之人若謂
伊父母已故不再爲忤逆情事卽准釋回殊非情理况該犯等

於親在時既敢於違犯失其歡心又安望其有依戀墮暮之誠耶此一條著卽刪去仍遵例不赦○丙子諭玉德奏稱李長庚心氣驕浮於提調官兵統轄全省水師之任未能負荷等語朕因檢查李長庚前任水師總兵時厯年考語書麟任內卽詳敘該員捕盜出力並稱該處洋匪有甯遇一千兵莫遇李長庚之謠詞經朕細詢該省來京人員僉稱果有其事而玉德兩次考語均稱其勇幹有爲調度有方爲水師出色之員本日玉德摺又稱其未能勝任與該督兩次密陳考語顯係自相矛盾卽或李長庚近來性情改變該督知之既真何不早行參劾迨朕擢任提督之後方爲此奏豈有甫經擢用因玉德一言卽將李長庚撤回之理玉德著傳旨申飭嗣後該督於所屬文武務宜秉公確覈詳慎密陳不得以一時愛憎任意軒輊○丁丑召長麟來京以惠齡爲陝甘總督調和

甯爲山東巡撫以李殿圖爲安徽巡撫姜開陽爲福建布政使察廷衡爲甘肅按察使由蘭州道遷○戊寅賜姚大寧等五十四人武進士及第出身有差○己卯命侍郎高杞莫瞻菉疏濬通惠河○甲

申諭人君董正治官躬親庶政非勤無以率作興事整飭紀綱虞書所言一日二日萬幾者非必一二日之間果有萬事誠以幾動於微若不隨機立應則一二日之曠廢卽萬事所由叢脞是以我皇考臨御六十年敬天法祖愛民皆以勤政爲本凡殿廷多以勤政顏額卽離宮別館辦事之所亦無不懸度兩字以昭心法朕繼承統緒夙夜勿遑以皇考之心爲心以皇考之政爲政實不敢稍自暇逸至於臣工膺股肱心膂之任尤當各揚厥職靖共匪懈蓋民生在勤勤則不匱君克勤則百度惟貞臣克勤則庶司無缺爲君難爲臣不易然人君獨理於上其任鉅人臣

宣力於下其職分今日之六部卽本諸周官分設六卿之意兵刑
錢穀各有專司且一部之中又皆設有庶官共襄其事遇有公務
更無難隨時商辦况近來各官部院大臣中並無以一人而兼數
任者尤不應於特交事件任意耽延乃前此交內務府議處膳房
該管大臣章京等係十月初一日之事至十一月初十日始據議
奏竟遲至四十日延緩已極向來交議事件如果應詳查例案悉
心定議者朕從不加之催促不但尋常事件期限較寬卽刑部速
議亦必予限五日或恐爲期過迫不能詳盡今內務府所議不過
罰俸處分無須詳稽例案數語可了其奏摺不滿百字何至遲逾
若此由此類推其因循貽誤之弊伊於胡底近來各部院衙門亦
均不能免堂廉至近見聞親切各衙門辦事尙爾怠弛則督撫等
分駐各省更易疏懈或於應辦事件藉口行查經年累月尙未完

結其廢弛積習尤爲牢不可破嗣後內外各衙門務當仰體朕夕惕朝乾勤求治理至意振作精神共相勵翼俾吏治蒸蒸日上毋得狃於晏安致干咎戾再近日諸臣中偶經朕頻頻召對卽以爲眷注優隆心存高興在朕前議論風生或閑時未經召見在朕並非有心而伊等輒妄生疑懼以爲前此奏對時未能稱旨遂爾一味緘默卽經朕面詢亦呐呐不出諸口卽如明安前任侍郎時朕見其人尙謹飭加恩用爲步軍統領伊卽意存自滿每遇召對一次陳奏不下十餘事又欲希圖獨對誇耀於人經朕嚴行訓飭從此於本分應辦之事亦不敢具奏是全不知以公事爲重惟以揣度迎合爲能豈大臣居心之道殊不思恩眷之隆督全不係乎召對之疏密如軍機大臣每日皆有事召對並有一日而召見數次者豈遇有獲咎之處亦不加譴責乎若外省大吏皆數年疎見一

次並有未曾來京見面者其居官賢否朕無不稔知如果政績卓著實心任事朕何嘗不頻加擢用乎大臣公忠體國總當一意對君盡心公事知無不言言無不盡不但殿譽榮辱早應置之度外果有裨國是卽身家禍福亦所不計方爲純臣事君之道况此等實心爲國之臣朕方獎擢之不暇亦豈有因公獲罪累及身家之理乃近日風氣見有一人不避嫌怨獨秉公論者眾人不以爲持正而轉相非笑致沮其忠讜之氣若人人容默自全必致漸成蒙蔽雖堯舜在上欲明目達聰亦不可得况朕德薄識淺再加之以諸臣不實心任事一味摸棱觀望實深懷畏本日召見軍機及各部大臣面加訓諭其各交相儆勉無忘無荒共襄郅治朕實有厚望焉將此通諭中外知之○諭琅玕等奏審訊伊桑阿騎都勒索及勦辦苗匪並未親赴石峴軍營捏飾具奏各款屬實定擬斬候

一摺所稱伊桑阿在貴州巡撫任內斥辱屬員驕擾驛站修造署房不發價值以扣繳養廉爲名令各府幫貼銀兩及縱容家人等逞威作勢索取屬員門包各款此猶罪之小者而其最重之罪則係辦理石峴苗匪時並未親赴軍營竟敢詭詞入告有心欺罔亦已據伊桑阿供認不諱若伊桑阿止於性情乖張貪贓營私雖罪亦難寬尙屬事所常有至其詭報邀功一事前據伊桑阿摺稱常明攻克石峴時伊親從銅仁趕到前敵傳諭各將弁四面兜圍並稱親見山梁上有執旗指揮苗目伊卽傳令帶兵各員向執旗之人指定放槍立時殲斃等語眞似身在行間厯厯如繪彼時據所奏情形自應加之恩獎是以降旨交部議敘朕豈肯豫料伊桑阿全係誑詞先存逆詐僥不信之見况朕辦理外省庶務惟憑各督撫奏章隨宜指示若於督撫陳奏到時卽疑其不實豈朕推誠待

下之理是朕實不忍以不肖之心待人伊桑阿竟敢以毫無影響之事公然欺朕乎軍營虛誑報功最爲惡習然或本係親身督戰得有勝仗因而虛報首功裝點情節已屬相沿鉗弊爲朕所深惡數年來力加整頓各路軍營奏報卽難保其無一字粉飾諒未有敢於將無作有憑空捏造者伊桑阿在京時豈不知朕於軍情務期覈實輒以身嘗試乎若各督撫相率效尤以誑奏爲得計是朕省旰勤求庶務所謂事事認真者全係枉費心力將何以用人行政耶且伊桑阿初放貴州巡撫時曾面奏請將養廉扣繳賠項並稱受恩深重卽全數扣繳到任後亦不敢因辦公不數營私敗檢情詞真切幾於指天誓日惟祈俯允所請彼時朕卽念及若將伊養廉全數扣繳恐辦公不敷是以止准扣繳一半伊桑阿當卽叩頭感謝並稱得以保全其廉乃一經到任卽向首府程煜等告以

用度不足勒索幫助是其挾詐面欺亦非僅貪汚婪索可比朕前
於伊桑阿陞辭出京時諱諭訓誨但恐其任性妄爲復萌故態初
不料其有操守不端之事甯復料其膽大欺上一至於此此而不
嚴加懲辦何以飭綱紀而正人心伊桑阿之罪諭其貪汚婪索較
富綱爲輕論其罔上欺君比魁倫更重自應按律擬斬請旨卽行
正法琅玕等特因朕年來辦理庶獄有不准從重之旨是以照例
問擬斬候卽發交部議亦必照覆但其情罪重大若特行降旨予
以立決轉似較常例加重見據琅玕奏稱伊桑阿染患瘧毒尙未
痊愈若久禁囹圄或因病自斃倅逃顯戮實屬不成事體且伊桑
阿所犯情罪俱已一一供吐更不值俟解京審訊後始行正法伊
桑阿著改爲毅立決派乾清門侍衛孟佳刑部侍郎瑚璽阿馳驛
迎赴前途於伊桑阿解到地方不拘何處旅寓卽帶同地方大員

及原解官員將伊桑阿立卽處斬以爲甘心欺君不顧性命者戒其餘琅玕等摺內所擬長隨盧慶等罪名著交刑部覆擬具奏並將辦理緣由宣示中外至見在各路軍營經朕飭加訓飭自不應稍有虛捏但此時功勳垂成恐伊等欲圖迅速成功稍存草率不免又萌粉飾之念儻所奏情形稍有不實開繫重大並著傳諭各路帶兵大員於奏報軍情務期確實當以伊桑阿爲前車之鑒○諭軍機大臣等琅玕等奏會審伊桑阿貪縱欺罔各款定擬斬候一摺已明降諭旨將伊桑阿卽行斬決並宣諭中外矣琅玕身爲總督於伊桑阿在巡撫任內驕縱勒索各款業已得其確據卽應早爲參奏乃琅玕並不名列彈章惟向同僚初彭齡告語其贍徇之咎實屬難辭卽伊桑阿誑報邀功之處亦難諉爲不知朕因琅玕在石峴地方搜捕苗匪尙爲迅速是以前此僅將伊降爲二品

頂帶拔去花翎以示薄憲嗣後該督辦理一切事務惟當一秉至
公以伊桑阿之欺飾爲戒再責陽府知府程煜於伊桑阿勒派幫
助一案業經革職但朕聞其平日官聲尚好且程煜旣據該督訊
明並無餽送銀兩情事其許向各府轉商幫助實迫於伊桑阿之
催逼尙有可原著琅玕將程煜在知府任內居官如何之處出具
切實考語據實查明具奏送部引見候朕再降諭旨○丁亥諭軍
機大臣等吉慶等奏洋盜陳添保攜眷內投並將繳出安南印敕
進呈據摺內稱陳添保因捕魚遭風於乾隆四十八年經阮光平
擒去封爲總兵等語可見積年洋盜滋擾皆由安南窩留所致卽
阮光平在日已將內地民人擄去加封僞號縱令在洋劫掠阮光
平身受皇考重恩如此喪心蔑理實非人類今聞該國僞詔內
有視天下如一家四海如一人之語尤屬夜郎自大若論其種種

狂悖本應聲罪致討惟該國見與農耐構兵轉不值乘其危急加以撻伐揆諸天理該國滅亡亦在旦夕更無庸以文誥化誨亦毋庸給予照會所有印敕等件見令銷毀該督等惟當嚴飭將弁巡緝各洋遇有安南盜匪竄入立卽拏獲懲辦其投出之陳添保並家屬夥盜等卽照該督所請於海洋較遠之南雄府地方分別妥爲安插仍不時嚴密稽查毋令出洋滋事○戊子額勒登保奏督勦通江一帶殘匪擒獲僞元帥冉添璜賊目龐思宇等得旨獎賚○己丑撥兩淮運庫銀四十萬兩分備陝西四川軍需○辛卯翰林院奏向來保送御史部屬翰林各爲一班部屬記名無人卽保部屬翰林記名無人卽保翰林後以部屬壅積先儘補缺係因一時調劑並非著爲定例今吏部以記名人員將次用竣行文各部院保送查編檢見在今例者僅十員若照上屆保送八員六員則

不敷選選若止保二三員則將來御史中部屬多翰林少不足以昭平允可否仍照舊例定爲分班陸續保送兩不相礙於選選亦昭慎重得旨允行○壬辰以三省教匪漸次蕩平命增移要隘營伍以資控制○移湖北德安府營守備駐隨州隨州營千總駐德安府○莊敬和碩公主下嫁科爾沁郡王額駙索特納木多布齊○癸巳諭都察院奏張伯行之曾孫張裕孚等應否與在京賢良祠後裔一體查辦一摺上年諭令八旗都統及各督撫查明入祀賢良祠子孫送部帶領引見經吏部查照定例將從前曾奉特旨入祀在京賢良祠之子孫按名查辦其外省題請入祀本處賢良祠者槩未列入蓋因各省名宦鄉賢等祠本與在京賢良祠有聞雍正年間特降 諭旨令外省各建賢良祠將文武大臣公忠正直勳節昭著者地方官具奏入祠歲時享祀此實我朝崇獎名

臣恩加無已至意張伯行在雍正年間居官清正嗣於乾隆六年
經該省撫臣題請入祀江甯賢良祠已足表其清節至於查辦賢
良祠子孫帶領引見殊恩曠典自有限制部臣以會奉特旨入
祀在京賢良祠者爲斷尙屬平允所有張伯行子孫無庸帶領引
見將來外省如有似此者均一體追辦○諭軍機大臣等軍務卽
日告嚴其善後事宜內惟安插鄉勇最爲緊要川陝楚地方還開
儘有官山未開荒地與其爲客民占據何如撥給鄉勇令其自安
耕作此外如有可興之利不妨奏明辦理如川省銅鹽等項或有
可以借資民生無礙於官而有便於民者各就該省見在情形量
爲措置○撥廣東商捐銀十三萬兩有奇備陝西軍需○甲午諭
軍機大臣等吉慶等奏安南保樂州夷人農耕連幫同農耐與阮
光續打仗見在三路進攻黎城等語安南地方被農耐屢次奪取

茲復進逼黎城看來阮光纘未必能保有境土但外夷彼此攜兵與內地無涉吉慶等當持以鎮靜不必過問止須飭令內地各邊隘嚴加防範並密爲偵探如安南爲農耐所併阮光纘敏闢請命或農耐占踞安南之後具稟到粵彼時吉慶等將實在情形卽行奏聞候旨辦理○乙未諭軍機大臣等此次李彬及劉朝選湯思蛟等股經官兵追擊所賸均不過四五百人勢極殘敗而七十五所勦苟逆轉增至二千餘人賊匪又得從容裹脅是七十五竟全不足特額勒登保等僅於摺內隱約其辭未免意存瞻顧著額勒登保等查明七十五沿途如何逗留或因舊病復發行走濡遲不能趕上賊匪均屬七十五之罪卽行據實參奏又據奏疏防甯羌職作爲兵丁留營效力贖罪至慶成慶溥等於西竄賊匪相距較

遠且能奮力勦捕其處分自可寬免但額勒登保等大兵見在追勦苟逆一股儻該逆被勦緊急或致折回陝境不可不豫爲防範著額勒登保等傳知慶成慶溥於陝省邊境嚴密防堵設有竄回之賊務須迎頭攔勦若防範不嚴致令竄入陝境則惟伊二人是問○額勒登保奏殲擒首逆高見奇僞帥周萬友等得旨嘉獎○湖北巡撫全保等奏進勦戴家營賊匪殲擒僞軍師鄭三元僞元帥褚貴等得旨獎賚全保長麟下部議敘○己亥升四川達州爲綏定府太平縣爲太平廳直隸同知太平營爲太平協並增移廳營員缺

十二月癸卯朔長麟奏慶成等在階州牛頭寺草川子等處殲擒苟文明股匪得旨嘉獎賞還慶成巴圖魯名號○甲辰諭八旗王公等馬廠地畝其無馬匹牧放者令官爲開墾給租○丙午以廣

泰爲內閣學士

由太常寺卿遷

○丁未諭前蒙

皇考高宗純皇帝特降

諭旨令軍機大臣會同部旗將國初以來殉節諸臣未經得受

世職者查明賞給恩騎尉世襲罔替仰見

皇考崇獎盡臣推恩

後嗣實爲異數隆施乾隆六十年先經軍機大臣等將在京八旗

從前殉節諸臣查奏一百四十餘員補行賞給恩騎尉世職茲又

據軍機大臣會同兵部將數年以來各省陸續咨到從前殉節諸

臣九百九十餘員查明開單具奏朕詳覈諸臣事蹟俱能抗節效

忠成仁取義允宜賞延於世用示褒嘉所有單開各該員子孫均

著加恩補給恩騎尉世襲罔替惟念該世職等承襲之後若照例

槩令分發標營學習其中或有未能諳習弓馬操防者轉非成全

之意所有世職人員著加恩凡遇承襲時在各本籍地方具呈分

別咨部除情願入標學習當差者仍照舊例支給俸餉外其有願

應文試者卽以本職頂帶作爲文生員願應武試者卽以本職頂帶作爲武生員准其一體應試嗣後各省凡遇應試恩騎尉世職均照此例辦理○癸丑定四川打箭爐稅額○甲寅截留湖北帶徵漕米四萬七千石備軍糈○乙卯諭前日吏部請簡內閣侍讀學士一本例應輪用郎中一員將各部郎中按照食俸年分開單進呈朕閱單內各員俱非素所稔知因黃永沛列名居首資俸較深是以簡用今據御史游光繹奏稱黃永沛未經保舉京堂又係捐班從前俸滿時該堂官曾定爲不勝外任恐其人少所表見並稱資格之說吏部以之選官則可皇上以之用人則似未可等語殊屬紕繆國家用人才行與年勞並重本無偏廢資格之理凡遇開列請簡各員朕豈能偏識其人自不得不按其資俸量加擢用此次吏部本內如果將不應開列人員蒙混廁入或將年俸深淺

任意倒置游光繹自應據實參奏若黃永沛平日或有別項劣蹟
游光繹見聞果確亦可列款彈劾乃該御史並未識黃永沛其人
僅以係屬捐班遂謂不應簡用試思從前 皇祖所用李衛 皇
考所用李世傑何嘗非捐班出身而歷任封圻政績卓著朝廷立
賢無方豈得謂以貲入仕者之竟無人才耶又該御史摺內稱侍
讀學士升轉小九卿數年之閒內爲侍郎外爲藩臬若徒取備員
何以仰副任使尤爲瞽說各部司員升擢小九卿後凡值日奏事
之期經朕隨時召見必察其才具實在可用者方予拔擢豈有不
論賢否但循資按格卽內用卿貳外用藩臬乎乃該御史所奏竟
欲於國家用人大柄持其短長又與前次御史王蘇之劾奏平恕
不應簡放江蘇學政相等明季科道惡習往往朝廷用一大僚輒
交章攻擊伐異黨同最爲言職之玷方今綱紀肅清豈容以此嘗

試游光繹妄逞臆見阻撓國是非尋常奏事失實可比著交部議處○己未諭吏部奏議處御史游光繹請照湖職例革職一摺昨游光繹陳奏以朕用人不當循照資格且稱黃永沛一員伊素不知其人豈皇上有所賞拔耶豈大臣保薦耶抑係僅循資格耶詞意狂率竟欲干與用人大柄紕繆已極國家序進官僚自有定制部臣循例請簡原當按其資格開列具題朕自必將資俸在先之員量加擢用徐試以事原不皆朕所悉悉之人若如該御史所奏槩廢資格而不論遇有簡放必須朕素所稔知則百爾臣工豈能槩行識認勢必將藩邸舊人槩予錄用轉私而不公况藩邸舊人焉能備內外百官之選豈該御史不知之人遂不可任用游光繹自思伊由翰林擢任御史又豈素有表見仰邀賞拔今乃欲朝廷盡廢資格而不用有是理乎如果部臣開列意爲高下或該員簡

用之後另有劣款科道等原當據實糾參今甫經擢用輒具章阻抑是用人之際科道等皆持其短長此風斷不可長且朝廷量能長官亦難保其必無一眚卽如簡放大僚或其平日曾獲咎譽或偶有不檢之處若皆索垢求瑕必致彼此交章攻擊百計阻撓成何政體游光繹率意妄言本應照部議革職但念伊究有言責此時若將伊罷斥在游光繹矢口妄言原無足惜誠恐科道等因此遂自甘穢默於言路殊有關繫游光繹著加恩改爲降三級調用嗣後科道等於應奏事件止當據實直陳不得因游光繹矯職相率囁嚅但必須秉公詳慎若有似游光繹之阻撓固是干與非分者必照例治罪不能再邀恩貸○撥兩淮商捐銀二十萬兩備四川軍需○癸亥諭劉清在川省有年聲名素好經朕加恩擢至道員嗣因冉添元股匪由太和鎮地方竄過潼河劉清係屬總巡疏

於防範實有應得之咎是以將伊降爲知縣但彼時劉清曾經稟明魁倫欲將貴州兵丁留於潼河一帶防堵因魁倫不准所請賊匪得以乘閒偷渡亦非劉清漫無籌畫所致該員自降補後在川北一帶管領鄉勇防守地方屢著勞績前已開復原官茲有道員缺出自應儘先補用劉清著加恩補授建昌道以示獎勵○戊辰汪志伊因病解任調李殷圖爲福建巡撫以王汝璧爲安徽巡撫調汪日章爲江蘇布政使以先福署江南布政使由光祿寺卿遷○己巳諭據禮部奏朝鮮國貢使曹允大等齎貢至京另齎奏本一件鈔錄進呈該國王以冲年襲封奉職屏藩適該國邪匪糾連謀爲不靖卽董率臣工殄除魁黨竄謚國都並將辦理顛末臚章入告所奏已悉惟本內所稱邪黨金有山黃沁玉千喜等每因朝京使行傳書洋人潛受邪術等語此則非是京師向設有西洋人住居之

所止因洋人素通算學令其推測謹度在欽天監供職從不准與
外人交接而該洋人航海來京咸知奉公守法百餘年從無私行
傳教之事亦無被誘習教之人該國王所稱邪黨金有山等來京
傳教一節其爲妄供無疑自係該國匪徒潛向他處得受邪書展
轉流播及事發之後堅不吐實因而捏爲此言殊不可信該國王
惟應嚴飭本國官民敦崇正道勿惑異端自不至滋萌邪慝至所
稱餘孽或有未淨恐其潛入邊門所慮亦是已降旨飭令沿邊大
吏一體嚴查設遇該國匪徒潛入關隘一經盤獲卽發交該國自
行辦理以示朕撫輯懷柔至意著禮部將此旨行令該國王知之
○辛未諭明亮從前在金川等處曾經屢次效力嗣遣往湖北勦
辦教匪亦尙奮勉後因追擊竄匪曠日持久是以將伊革職治罪
尋又遣往湖北追捕徐添德一股逆匪節次擒獲賊目殲除賊匪

加恩給四品頂帶補授宜昌鎮總兵本年因念伊年邁有病乘騎
雜艱諭令來京賞給二等侍衛令在乾清門行走今聞患病朕心
深爲轉念明亮著加恩賞給副都統銜仍在乾清門行走令其安
心調養俟病痊再行供職○壬申額勒登保等奏勦辦通江賊匪
苟文明斬獲多名斃賊目苟朝獻等得旨獎賚○是歲朝鮮邊羅
來貢○會計天下民穀數各省通共大小男婦二萬九千七百五
十萬一千五百四十八名口各省通共存倉米穀三千四十八萬
三千八百七十九石四斗一升七合九勺

臣王先謙敬編

周潤蕃恭校

嘉慶七年壬戌春正月癸酉朔 上啓鑾謁 裕陵○免經過地方額賦十分之三○予經過通州等四州縣貧民棉衣二萬件○甲戌定祭 社稷壇用上戊○乙亥 上謁 裕陵行三周年祭禮○丙子 上謁 昭西陵 孝陵 孝東陵 景陵復謁 裕陵回鑾○以順天府文安縣地窪水積永減額賦十分之三○戊寅 上還京師○己卯諭朕聞上年江西正考官周興岱前赴該省以侍直內廷炫耀高興口稱有奉旨查訪地方之事並擅出告示收受程儀等情恐未盡確實當卽親書硃諭密令張誠基秉公詳查並諭此事若虛卽差人覆奏如果屬實卽由三百里奏聞儻

張誠基查明實無其事尙當明降諭旨爲之湔雪乃張誠基由驛奏到之摺與朕所聞無異當將原摺批交周興岱明白回奏茲據伊奏稱興江西地方官接見時並未提及查訪地方事務惟素聞該省房官多有舞弊是以於入閩前出示嚴防閱卷時有呈薦草率者面加駁斥至巡撫司道及房考官向例致送程儀曾再四堅卻始行收受等語朕簡派各省考官專爲掄才大典原不干興外事卽周興岱係內廷行走伊陞辭時亦並未令其兼查地方事件今伊回奏摺內於此一節雖不敢自行承認而其擅發告示收受程儀衣服業已屬實各省主考專司衡校防弊係監臨責任今周興岱擅出告示卽係有心炫耀况該省致送正考官贍儀較副考官增倍若非周興岱以供奉內廷在外誇張何以該省官員畏其聲勢餽遺從厚耶周興岱係戶部侍郎兼管錢局二品頂戴得項

優厚非如翰林部曹等官職分較小者可比奉命典試自應潔己
奉公保全顏面乃於該省官員餽送銀兩輒行收受並告以未帶
冬衣致撫藩等添送衣裘殊屬卑鄙豈可復玷內廷清秩周興岱
著退出南書房仍交部嚴加議處至外省地方大吏節經降旨嚴
禁餽送今張誠基等不但仍沿陋習致送主考程儀並因周興岱
係屬內廷增多見好且據張誠基摺稱該省彌補虧缺將從前浪
費省出歸公似此濫行餽送非浮費而何況周興岱卽向人炫耀
亦不過詞氣之閒偶有流露何至通省相率趨承甚至周興岱口
稱未帶皮衣卽行餽送可見張誠基等平日辦事必非無瑕可指
慮其舉發故爾曲意周旋仍蹈逢迎積習張誠基邵洪衡齡俱著
交部議處向來正副考官奉差出京無論官階大小各按省分遠
近賞給盤費並准馳驛前往行走已屬從容其職分較小之翰林

部曹等官出閣後督撫兩司養廉優厚或致送土儀稍助路費尙屬地主之誼至房考各官俱係州縣祿入無多若破產餽送主考必致賣舉子通關節而主考受房官之餽送何能秉公閱卷嗣後不得私自餽遺考官亦不得輒行收納若考官係三品以上大員卽督撫兩司亦不准致送路費儻經此次訓諭之後仍有私行餽遺收受者一經查出卽嚴行懲辦將此通諭知之尋議上降周興岱爲四品京堂張誠基邵洪衡齡加恩革職留任○壬午召保甯來京供職以松筠爲伊犁將軍○調平恕爲戶部右侍郎以李鈞簡爲兵部右侍郎由內閣學士遞○癸未以三月謁西陵豫予經過涿

州等五州縣貧民棉衣一萬件○以關槐爲內閣學士候補內閣學士○甲申增設湖北鄖陽鎮屬守備三員千總四員兵八百二十名○撥湖南藩庫銀十五萬兩備湖北軍需○戊子撥山西河南藩庫

兩淮長蘆運庫銀各十萬兩備陝西善後事宜○己丑諭軍機大臣等英善福甯奏籌辦邊界情形一摺蘇班色本係從前作木郎部長之叔當作木郎地方被廓爾喀占去蘇班色投入科洽邊界時卽不應容留住乃彼時旣准其來藏安置而達賴喇嘛等給與口糧已歷有年今若將伊逼出邊界必遭仇害或致情急自戕且因廓爾喀差人向索卽將蘇班色送出亦非天朝體制英善福甯應飭令派出之員善爲開導如蘇班色情願搬移卽聽其便若實無可歸之處卽照所奏於前藏另籌地方將蘇班色跟隨舊人盡行散去止令帶親屬數人妥爲安插旣可不至滋生釁端且達賴喇嘛本與作木郎素好卽可交伊照管亦足以安達賴喇嘛之心並當曉諭蘇班色以此次乃天朝格外加恩伊惟當安心居住不可少滋事端黨仍有不安本分之處王法具在不能再爲寬宥

俾知儆惕至另片奏廓爾喀父子內閑情形此事與內地無涉英
普等當遵照前旨不必過問惟嚴飭邊界密爲防範毋令該部落
之人竄入境內爲要○辛卯諭山西巡撫伯麟奏請晉鹽行銷地
界給票驗放以杜偷越一摺晉鹽課歸地丁原以便民茲於晉豫
關津等處層層驗票始令販運誠恐官吏等從中勒索致滋弊端
而於稽察私販越境仍無裨益其如何設法嚴禁越販又不至擾
累商民之處著該部詳悉妥議具奏尋議晉省池鹽向係行銷豫
省自乾隆五十七年課歸地丁任聽商販本以便民茲恐其偷越
楚省遂欲明立限制給票稽察勢有難行應無庸議至向來稽查
鹽斤係於橐津等渡令其對渡登岸勿許順流直下實爲查禁私
橐要務應令撫臣責成地方官會同營汛於鹽斤到黃河北岸飭
令對渡南岸不許順流駕船由黃入洛由洛入汝越至楚境又河

南南陽府屬之南陽等七州縣共冇水陸要隘三十七處地方文武員弁稽查私梟越楚係屬定例亦應再行申明惟在各督撫督飭所屬實力奉行則販運既難腳價亦貴私販無利其弊自止從之○陳萬全以疾乞假允之轉李鈞節爲兵部左侍郎以劉鑑之爲兵部右侍郎由內閣學士遷○甲午諭嗣後 大祀 中祀遇忌辰不政祭期○額勒登保奏生擒首逆辛聰殄除餘黨得旨獎賚○吳熊光等奏按勦邊境匪匪生擒首逆張允壽子得貴並將青號餘匪全數撲滅得旨獎賚全保長齡下部議敘○乙未諭本日軍機大臣會同刑部審訊袁錫等開圈聚賭一案將袁錫供詞進呈內有曾託鄂羅錫葉勒圖向明安說情交給一千兩銀票之語彼時朕以爲必係鄂羅錫葉勒圖從中取利抑或明安家人借端勒索亦未可定茲復經承審大臣訊據鄂羅錫葉勒圖供稱因與袁錫

素相認識代伊轉求明安並言事後致謝明安當卽應允數日後
明安向鄂羅錫葉勒圖當面提及伊卽赴袁錫家內取得票銀一
千兩是日明安正差家人在彼坐索鄂羅錫葉勒圖先將五百兩
交明安家人收去存留多日其餘五封暫存鄂羅錫葉勒圖家迨
明安探聽外面風聲不好遂將原銀退還等語是此案竟係明安
聽情受賄殊出意料之外明安本係世家舊族向來在乾清門當
差行走尙勤是以節次加恩用爲步軍統領原期於世族中成就
一可用之材以備任使乃不料其骯法營私竟不能全朕用人顏
面然朕於明安亦無先見之明也上年明安會奏請開採煤礦銅
苗等事朕彼時卽覺其沾沾言利嗣因欲請獨對炫耀高興疊經
降旨嚴飭冀其悛改詎明安於袁錫開圈闢鵠之案竟公然得受
賄賂雖先侵後吐實已枉法得贓則伊任提督一年以來似此竇

蓋不飭之事諒復不少猶幸及早發覺不至久玷要任此皆仰蒙
皇考默示啓佑益深欽感明安以提督大員而卑鄙無恥若此
實係自取罪戾不能承受朕恩此而不嚴加懲辦何以儆貪黷而
肅官方明安著革職拏問交軍機大臣會同刑部嚴審定擬具奏
鄂羅錫葉勒圖袁錫亦著革職拏問李渝清冒俱著革職一併歸
案辦理嗣後大小臣工務當潔己奉公廉隅共矢以明安爲戒儻
不知檢束自蹈刑章一經發覺朕必執法嚴懲斷不稍貸將此通
諭知之○乙未以瞻柱爲直隸布政使處章爲直隸按察使由熟
遷○丙申發明安伊犁效力○丁酉諭本日祿康具摺謝恩內稱
步軍統領與刑部衙門向有交涉事件懇辭刑部尙書或請另放
步軍統領等語步軍統領衙門其刑名事件應行送部審理者甚
多自不便以一人兼攝祿康所奏甚是但昨已將伊簡放亦不必

再行更換祿康著專辦步軍統領事務仍兼正黃旗漢軍都統所
遺刑部尙書員缺著德瑛補授瑚圖靈阿著轉補刑部左侍郎所
遺刑部右侍郎員缺著廣音調補繼善著調補盛京刑部侍郎所
遺盛京禮部侍郎員缺著多慶補授○己亥諭軍機大臣等額勒
登保奏報苟逆由西鄉向七星壩搶船偷渡殊出意料之外七星
壩一帶本設有防兵額勒登保前因賊氛已遠遽行撤去是以苟
逆探知無兵備禦遂肆無顧忌搶船偷渡額勒登保係經略大臣
統轄各路已有疏忽之咎况江岸官兵是伊裁撤不能先事豫防
其自請重加治罪之處實所應得但念其從前帶兵打仗屢著勞
績姑從寬革去伯爵降爲一等男並拔去雙眼花翎著換戴單眼
花翎以示薄懲所有此股過江之賊卽責成額勒登保專勦務於
石泉等處就地殲除萬一賊匪潛入南山額勒登保必當飭催鎮

將入山搜捕斷不可僅在山外株守稽延時日○停左右翼總兵官城外值宿仍隨時出城查察○庚子 上御經筵○以劉鳳誥爲內閣學士由太常寺卿遷

二月癸卯諭軍機大臣等陸有仁奏苟逆過江以後分爲數股逸入南山額勒登保由石泉漢陰統兵前進扼賊東竄之路年來賊匪潛入南山帶兵大員不能上緊搜捕任賊匪在山內展轉裹脅數月後又復任其逸出延緩積習最爲可恨此次苟逆旣經北竄入山卽專交額勒登保一手辦竣其應如何堵截勦辦之處朕亦不爲遷制但須剋期辦竣勿令蔓延○諭各路軍營奏報皆稱賊匪窮蹙不成股數指日卽可蕩平乃近日節據額勒登保德楞泰勒保等奏報苟逆竄過漢江其餘巫山大甯奉節雲陽梁山新甯及興山巴東等處賊匪四出滋擾賊數較前頃增數倍此等賊匪

皆係從前勦贗各股餘孽如陳朝觀之兩子及宋應伏等向來本未著名今忽湊聚成股隨處竄擾若不亟爲撲滅必致又成大股在賊匪狡猾伎倆總以嚴冬竄伏川陝交界深山老林爲延喘伺隙之計帶兵大員隨賊追逐於各處潛藏之賊或未能悉至地方州縣於本境管轄深山老林不過一二百里耳目易周如果有賊匪伏匿境內該處地方鄉保不難嚴密稽查隨時稟報該州縣等斷無不知之理乃各州縣以勦辦事宜爲帶兵將領專責而於賊匪潛藏本境置之不問試思州縣官所辦之事有過於此之重大者乎此時各處賊匪旣已出山紛竄雖係餘孽皆當隨時隨地上緊截剿埽除淨盡六年以來勦賊之法總係跟蹤追勦賊匪等多分股數牽綏官兵兵至則四散潛藏兵退則分股滋擾是該匪等轉得輪番休息以逸待勞而我兵昕夕追馳日形疲乏主客之

勢不明以致中賊詭計日久遷延迄無成效自宜亟籌變計各專責成勉圖奏績此時陝境苟逆及各處零匪專交額勒登保督同楊遇春等辦理川東一帶之賊專交德楞泰辦理川北之賊專交勒保賽沖阿等辦理楚省興山等處各匪專交吳熊光全保長齡等辦理務將各人專辦之賊卽在本境內就地殲除不得以驅逼出境了事如有他省竄至之賊亦卽當隨時截殺俾賊匪所到之地皆有兵截勦無從逃逸可期以次肅清並各於要隘處所添撥兵勇嚴密防範務使聲勢聯絡互相接應於勦捕方爲有益再統計各處竄匪不過萬餘而額勒登保等所帶征兵數倍於賊諒敷勦辦但恐官兵日久疲勞應須酌換或分則見單不敷撥遣不妨量爲添調不得以前此奏請撤兵意存回護○撥安徽藩庫銀十萬兩備湖北軍需○乙巳發京倉稻粟米二萬五千石於五城平

耀○丙午諭秦承恩前在陝西巡撫任內因辦理軍務遲延獲咎

發往伊犁效力贖罪茲一年期滿釋回京念伊本係書生未嫻

軍旅其平日辦理地方事件尙爲熟悉亦無操守不潔之處秦承
恩著加恩以六部主事遇缺卽補○丁未釋奠先師孔子○戊

申以那彥成爲內閣學士

由詹事遷

○己酉召長麟來京命賽沖阿回

陝西協勦教匪○辛亥撥河南山東藩庫各五十萬兩山西鹽庫
銀一百萬兩備四川善後事宜○乙卯實授博興理藩院尙書○

庚申命盧溝橋黃村東壩采育四處增設飯廠○撥雲南積存錢

一百萬緡備四川軍需○壬戌諭副將韓自昌勦賊陣亡前經額
勒登保奏到當卽交部賜卹茲聞伊卽係前次陣亡副將韓加業
之胞兄弟兄均歿於王事且家有八旬老母甚爲可憫韓自昌著
加恩照總兵陣亡例議卹其一切咨送回籍俱官爲彌理再加賞

伊母銀三百兩並著惠齡派地方官於伊原籍官建祠堂一座賜
名雙烈祠令本處地方官春秋致祭伊共有子幾人俟服闋後俱
著送部引見如無子嗣卽查伊胞姪咨送以示朕優卹忠義至意
○甲子秦瀛因病乞假允之以李亨特爲湖南按察使由江西監道遷○
乙丑諭御史王甯焯奏請重軍機大臣責成以肅綸言一摺自雍
正年閒初設軍機處於大學士各部院尙書侍郎中遴派數人在
內行走本爲籌辦軍務而各直省寄信事件以及在京各衙門遇
有應降諭旨勢不能紛紛令羣工承繕是以俱由軍機處擬寫交
發令事有統彙以昭畫一是軍機大臣承旨書諭並非將臣工翊
贊之職盡責之此數人也內外滿漢大臣俱經朕特加擢用誰不
宜盡心匡弼必專責之軍機大臣則其權過重若承奉諭旨之事
軍機大臣得以力阻不行則外人又將以攬權指摘矣况我朝

列聖相承乾綱獨攬 皇考高宗純皇帝臨御六十年於一切
綸音宣布無非斷自 宸衷從不令臣下阻撓國是卽朕親政以
來辦理庶務悉遵 皇考遺訓雖虛懷延納博采羣言而至用人
行政令出惟行大權從無旁落朕初閱該御史所奏以爲必有指
陳時務臚舉切要者及詳閱摺內乃專指上年停止前往盛京一
節謁 陵展敬爲登極後應行大典朕彼時明降諭旨於六年秋
孟啓行事關禮制豈臣下所可阻止嗣因御史沈琨張鵬展等以
軍務未竣懇請展期交王大臣等會同妥議以爲應如所請是以
降旨暫行停止卽上年春閒曾有旨巡幸木蘭後因夏閒雨水過
多亦停止秋獨此皆朕臨期酌度豈軍機大臣能於春閒卽逆料
夏雨情形豫爲阻止耶至該御史稱鑾輶所經地方官早爲備辦
永平一帶糜費已多不能開銷等語謁 陵諭旨係五年十一月

初二日頒發至六年正月二十七日降旨停止爲時無幾且距七月啓鑾之期又遠地方官有何豫辦不能開銷之處乎至該御史所奏前諭已發復行改擬不敬於先遂致不信於後等語試思前史所稱爲詔令不信者如恩旨已降或應行蠲貸而實未均霑或業已豁除而仍行科斂我國家曾有此等事乎至於明發諭旨有經朕再四思惟尙有未盡周妥之處或臣工陳奏未便因而復行停止者此正欲事臻盡善故不厭反復精詳若必回護前旨固執己見勢將文過飾非蹈言莫予違之習豈古帝王從善如轉圜之道乎又所稱軍機大臣昧於大體不當僅於語句筆畫小誤始行自請議處所論亦屬非是謄寫諭旨雖係草率之責但軍機大臣於進呈事件理當敬謹校覈既有錯誤自應請議况朕亦時加寬免何嘗僅於細務加之責備耶國家設立言官原期於國計民生

指陳利弊近日科道陳奏其略有確據者朕無不立加根究卽如朕擢用明安因御史江鏞參奏鬪鴉一案經軍機大臣會同刑部審出明安聽情受賄情節請旨解任當卽將明安革職至定擬時承審大臣奏請發往烏嚕木齊又經特旨改發伊犁而江鏞卽予升擢何嘗不獎言路以宏采納但其敷奏毫無指據者亦安能槩予施行見在邪教餘匪未淨科道等並未將如何設法綏輯如何籌及生計及功竣後如何辦理善後事宜卽外省地方倉庫如何積貯充實等事一一酌籌切實具奏而直隸州縣被災飢民節次發帑設賑及散給棉衣以工代賑近日京城附近地方飢民領賑者至二萬五六千人見又於城外增添飯廠亦從未有御史一言奏及其曉嘵演奏者如用平恕則王蘇以爲不應復任江蘇學政用黃永沛則游光澤以爲不應僅循資格用人黜陟爲朝廷大柄

該御史等於諭旨既發後尙欲奏請撤回而王甯焯於應行改撤之旨轉以爲不宜更易若國家用人行政其是非得失悉聽諸言官臆說勢必假公濟私把持朝政如明季科道劣習亦豈能於朕前嘗試耶王甯焯所奏謬妄著將原摺擲還嗣後科道等遇有應行陳奏者仍直言無隱毋得似此率行妄陳自干咎戾將此通諭知之○增設直隸永定河兵四百名○丙寅雲南維西廳猓匪首逆腊者布恆乍綑句結猓猓夷匪滋事命琅玕勦之○額勒登保奏道員劉清生擒首逆李彬及辛聰之弟辛文殲斃餘匪多名得旨嘉獎賞劉清按察使銜並花翎○丁卯辰賑廣甯門外普濟堂德勝門外功德林留養貧民一月○命廣甯門外增設飯廠○己巳勒保等奏疊次痛効陳自得一股賊匪殲擒殆盡田朝貴追勦張魏二逆及宋國品等連次斃賊多名得旨獎賞

三月癸酉勒保奏殲斃首逆張添倫魏學盛及僞元帥陳國珠等
得旨嘉獎下部議敘○乙亥 上親耕耤田○丙子免湖北教匪
滋擾之鄖縣等四十二州縣額賦並積年逋賦○丁丑德楞泰奏
截勦綏號賊匪斃首逆龔其堯生擒老教師李世漢李國珍等全
股洗淨得旨獎賚○戊寅 上啓鑾謁 西陵○閻永定河工○
免經過宛平縣明年額賦十分之五良鄉等五州縣額賦十分之
三○庚辰展賑京城內外災民一月○壬午 上謁 泰陵 泰
東陵回鑾○戊子予故安徽巡撫荆道乾祭擇其子孫一人送部
引見○庚寅 上還京師○諭各省徵收漕糧禁止折色定例纂
嚴朕親政以來於漕務事宜大加整頓期積弊漸就肅清乃近聞
有漕省分尚不免有浮收及得受漕規者是積習仍未悛改並聞
各州縣往往於開倉時逾額浮收迨米數既足遂私行折色竟公

然設局定價並有於開倉之始卽先行折色虛報滿廩自用賤價
買補於兌糧時兼有折兌之弊而運員旗丁之揩勒奸胥蠹吏之
舞弊劣衿刁民之把持皆由此而起其受累者惟在安分良民以
天庾正供徒爲不肖官吏紳士等牟利之途蠹國病民莫此爲甚
著傳諭有漕省分各督撫率司道等官嚴行查禁嗣後州縣官徵
收漕糧槩以本色兌收無得仍前私收折色儻敢仍前弊混一經
查出卽照枉法治罪再聞州縣官於徵收本色時往往以米色平
常藉詞挑斥卽實係乾圓潔淨者亦必多方勒指使花戶等守候
需時百端苦累自不得不以折色改交此次申諭之後伊等或又
陽奉陰違於本色收倉時故意留難刁頗以爲需索地步此風尤
不可長並著該督撫等嚴行查察既不得改收折色亦不得於本
色過事苛求違者嚴參治罪若該督撫不能實力訪查甚或有意

瞻徇經朕察出或被人參奏必將該督撫等一併懲治決不寬貸
○辛卯以四川民人續輸津貼軍賞銀免溫江等三十三州縣地
丁銀十分之三華陽等三十三廳州縣十分之二成都等二十五
廳州縣十分之一○撥浙江商捐銀四十萬兩備四川善後事宜
○壬辰戶部尙書成德卒贈太子少保予祭葬謚恪慎○以祿康
爲戶部尙書○甲午諭京師五城地方煮賑原於城內城外分設
十廠嗣經降旨展賑時慮及近郊一帶農務方殷若令力作貧民
進城領賑道路未免糾遠是以命將五城正副十廠併作五廠在
於城外安設今據祿康等查明五廠領賑人數開單具奏朕詳加
檢閱自併廠以後較前分設十廠時人數少至一半自因城內老
弱貧民又以城外路遠不能前往領賑殊爲惻念因命軍機大臣
傳到五城御史而行詢問該御史等果稱連日領賑俱係城外原

領貧民並無出城內赴領者等語見在施恩展賑原因青黃不接俾災黎得資飽腹自應令京城內外貧民一律齊落實惠併廠之旨係朕誤降以致城內貧民忍飢數日朕從來不憚改過著仍於城內改回二廠責成該御史等妥速經理勿使一夫失所○庚子授江西藩庫銀十萬兩備湖北善後事宜○是月協辦大學士兩廣總督吉慶奏住居澳門之大西洋夷人稟稱有英吉利夷船泊零丁洋距澳甚近欲登岸借居夷房恐其滋事懇求保護當卽飭諭英吉利夷船回國毋許登岸澳門夷人情形安靜得旨有犯必懲切勿姑息無隙莫擾亦勿輕率

夏四月辛丑朔陳大文因疾乞解任允之以熊枚署直隸總督○甲辰增設秦博士伏勝後裔五經博士一○戊申轉成書爲兵部左侍郎以長麟爲兵部右侍郎○召熊枚來京以顏檢署直隸總

督調馬慈裕爲河南巡撫以高杞爲湖南巡撫由兵部左侍郎_退

_{由都}

○庚戌

皇后行躬桑禮○壬子西成卒以普福爲左都御史_統巡撫

_巡

○癸

丑以京師缺兩處賑京城內外災民○甲寅撥河南藩庫銀二十萬兩增建陝西營汎兵房○免直隸旗租逋銀○戊午分直隸保定等九處駐防官兵爲左右翼各設稽察大臣一○辛酉諭據抵柱奏署直隸總督熊枚請將御史費錫章隨往在署幫辦事務殊屬冒昧請嗣後嚴飭在京大臣奉命署理督撫者不得援以爲例等語所奏甚是御史係屬言官本非大臣可以贍帶之員前熊枚面奏聽將費錫章隨往朕卽覺其所奏未協因伊係署任暫時姑允所請嗣能到任後旋據奏稱先令費錫章回京供職業經批諭該署督奏請帶往原屬冒昧並令費錫章卽行回京今祇枉適有此奏與朕批諭正相符合國家設官內外各有體制督撫身任

封疆自司道以下皆係幫同辦事之人至署中一切案牘自有幕友襄理若由部院簡放督撫者皆得各帶所屬司員前往辦理恐司員等揣知該堂官堪膺外擢豫爲趨奉一經簡放督撫即可帶往辦事補用道府易啓屬官營求之弊亦不可不防其漸嗣後在京部院大臣除有兵差審案之事仍准隨帶司員外其簡放督撫及署理督撫者不但不准請帶御史卽所屬官員亦均不准奏請隨帶如有違例陳請者卽當交部議處以肅政體而杜弊端○壬戌 上詣 黑龍潭祈雨○撥江西河南藩庫銀各二十萬兩湖北藩庫銀十萬兩備湖北軍需四川米一萬石備陝西軍需○乙丑 賜吳廷梁等二百四十八人進士及第出身有差○丙寅雨○諭總管內務府大臣等奏文淵閣武英殿御書處藥房咸安宮御船處樂部清字經館等八處向係欽派王大臣管理其各該處承

辦之員遇有缺出請改由內務府衙門於司員內酌量繁簡揀派
咨送並將各處兼攝之員開單酌擬裁減等語朕詳閱單內武英
殿御書處並無內務府大臣兼管伊等輒敢將兼攝司員率請裁
減不論彼處能辦與否若如所請彼處王大臣必又乞恩保留紛
紛濶奏成何體制其御船處咸安宮等處見有內務府大臣兼管
其事務並不甚繁而兼攝之員仍令照舊並未聲請酌減所擬未
免偏私近於專擅弄權此等伎倆竟敢在朕前嘗試耶且該管王
大臣需用司員如必向內務府咨取內務府大臣又豈肯將得力
之員派往於公事殊屬無益著內務府大臣會同各該管之王大
臣或將內務府兼攝司員量爲裁減或將各該管王大臣所屬各
員派令兼攝之處一秉大公屏除意見悉心詳覈具奏管理內務
府大臣等除巴甯阿在工外俱交吏部察議尋議上得旨吏部察

議內務府大臣一摺前此豐神濟倫召見時曾奏及伊係武英殿總裁於武英殿御書處司員不能管轄呼應不靈彼時朕卽覺其又自滿矣嗣據內務府衙門奏稱將各處兼攝司員開單酌擬裁減內武英殿御書處並無內務府大臣兼轄伊等卽欲將兼攝司員裁減其有內務府大臣兼管之御船處咸安宮等處所有兼攝之員並未聲請酌減實屬偏私近於專擅是以降旨將該大臣等交部察議此事顯係豐神濟倫一人主見眾人隨從附和從前和坤兼管部院各衙門事無鉅細俱聽伊指示其餘各堂官不過隨同畫諾最爲惡習近年以來稍知悛改各部院中派出管理之大學士及尙書侍郎等秩分雖殊凡遇陳奏事件俱應互相商榷不得獨出己見况內務府大臣分位相等並無正副之分豐神濟倫乃敢率意專擅而眾人亦隨同具奏是內務府大臣縕布等尙不

免沿向來趨奉積習必欲陷豐紳濟倫於重罪矣部議擬以降二級調用均屬咎所應得但念豐紳濟倫等所管部旗各衙門事務較多若紛紛盡行降調一時更換乏人豐紳濟倫著加恩改爲革職留任緝布明德英和額勒布蘇楞額均著加恩改爲降三級從寬留任○再展賑京城內外災民十日○丁卯慶成奏生擒首逆魏洪升張喜僞先鋒白庸等得旨獎賚

五月辛未以陳霞蔚爲左副都御史由通政使遷○丁丑諭八旗回子身後遺孤不願歸原處者照八旗例給錢糧一分○己卯睿親王寶恩薨予祭葬謚曰慎以弟端恩襲爵○庚辰賞故琉球國副使鄭得功治喪銀三百兩○辛巳琅玕奏擒獲首逆腊者布得旨嘉獎賞還花翎○壬午勒保奏生擒首逆廣向瑤並老教掌櫃徐添培張思從賊目多名得旨獎賚○丁亥撥河南藩庫銀十萬兩廣

東藩庫銀三十萬兩備陝西軍需○己丑琅玕奏攻克康普賊寨
勦淨北路獮匪得旨嘉獎賞還一品頂帶○庚寅諭軍機大臣等
費湧等覆奏訊明任兆炯於徵收漕務並無營私情弊請仍將該
員送部引見一摺已准所請至另片奏稱因蘇屬積虧不能即時
彌補計州縣收漕貼費外尚可盈餘飭令該員照缺分大小交出
歸公見已提補三十七萬有零等語自屬實情但地方倉庫短少
如果係實欠在民之款一經該督撫等確查具奏朕無不加恩豁
免_皆係官侵吏蝕自當據實參奏著落追賠至設法彌補原係各
省權宜辦法豈可公然以此爲名令各州縣向百姓浮收漕米設
立漕餘名目提取歸公試思正供原有定額今設立漕餘名目使
百姓等於額外輸將此非加賦而何況州縣等知本任倉庫有虧
可以浮收漕糧彌補勢必將公項私自那移作爲虧空百弊叢生

皆由於此所辦已屬非是該督等所稱嗣後設法撙節不復取之
漕餘自應如此辦理至所稱蘇松太等處地處低下米色不純折
耗較多收數不能不寬卽貼費不能不重等語無此情理東南產
米之鄉蘇松尤爲沃壤與浙省杭嘉湖相等從未聞有蘇松米色
低下之語卽聞因水旱地方偶有青腰白臍米色亦不過百中之
一二焉有同郡一律低下之理况此三處近年並未被水旱之災
米色何由低薄至旗丁等多索貼費自係聞知該州縣浮收漕糧
遂爾心存挾制與米色有何關涉若云米色不純卽須多加貼費
宜旗丁索費兌收沿途私買好米到通交納乎且旗丁等向來沿
途使費早經降旨裁革復經節次加恩准其多帶土宜並割給曬
處米石撥給漕費錢文多方接濟不一而足丁力已屬寬裕何至
江蘇一省每年尙須貼銀三十餘萬兩之多所奏殊不確實况據

奏稱該旗丁等於五年六年屢求增益似此遞年加增伊於何底卽各幫情形不同間有一二疲丁尙須略增津貼亦止可另爲設法調劑何至欲以貼費之多少爲收糧之盈縮若如該督等所奏指稱蘇松太三屬米色低下貼費獨多則收漕亦必較他屬增倍此三屬爲江蘇省財賦最盛之區如此巧爲立說任聽州縣等明目張膽例外浮收通省漕務尙可問乎至所稱民情日久相安並有情願折色交納等語尤不成話折色一事最爲漕務弊藪各州縣收漕往往於開倉之始恣意浮收數日後額徵之糧業已滿廩卽勒令糧戶等折給錢文設有一二花戶載米到倉輒以米色不純駁斥留難刁蹬小民等守候日久不得不聽交錢文是浮收折色二弊相連而致百姓方抱怨之不暇轉謂情願折色乎前經明降諭旨嚴禁折色該督等竟以病民之事爲便民之舉於奏牘內

顯露其意仍思照前折色伊二人爲屬員所愚一至於此且浮收漕糧府州縣等斷無不從中沾潤之理費滔岳起平日操守廉潔原可信其無他而屬員賢愚不等豈能盡信卽知府中如任兆炯者恐難保其果無肥私情弊況提補漕餘該督等摺內亦稱該府與各府公同商議可見此議創自任兆炯而各府同聲附和若云毫無染指其誰信之試思江省漕務該督等旣經提取盈餘歸公彌補又以旗丁津貼不得不額外加增而各府州縣尙於此內各思肥己層層朶削無非苦累吾民費滔岳起身任封圻不思仰體朕愛憲黎元至意輕信屬官愚弄公然以大干例禁之浮收折色諸弊視爲不得不率爾密陳妄爲嘗試本應將費滔岳起照例治罪姑念伊二人向來辦事尙屬清慎著傳旨嚴行申飭又另片奏請降諭旨飭禁積棍刁衿鬧倉滋事等語此等包漕滋事生監

各州縣開倉之先該督撫等出示嚴禁隨時查察係分內應辦之事今必欲奏懇降旨飭禁汝等平日所司何事又安用此督撫爲耶前次降旨諭令各省收漕禁止折色原因刁衿劣監包攬把持皆由折色而起乃伊等不清其源而專欲懲治生監土豪以爲奉有諭旨則地方官卽不慮其挾制生監等目覩浮收情弊亦不敢與之計較伊等之意豈能逃朕洞鑒耶此次提取歸公銀三十二萬餘兩業據各州縣解交已屬旣往不咎嗣後漕餘折色二事當永行禁止儻陽奉陰違仍前滋弊經朕訪聞或別經發覺必將費湧岳起革職治罪不能再爲寬貸也懔之慎之○甲午慶成奏勦捕張魏餘匪生擒僞元帥康二麻子僞總兵張昌元等得旨獎賚加太子太保○丙申諭禮部奏伊犁春秋致祭格登山等處山河乾隆二十六年原頒祭文十六道應否增改請旨遵行一摺仰惟

皇考高宗純皇帝平定新疆版圖式廟懷柔河嶽祀典昭垂自
應億萬年遵守原文用彰偉烈所有前頒祭文內原書 朕字俱
敬謹改書 高宗純皇帝尊稱其餘字句槩無庸更改該部卽行
文伊犁將軍永遠欽遵入於交代其烏魯木齊等處亦照此畫一
辦理

六月癸卯琅玕奏兜勦康普葉枝夷匪西北兩路全境疏通○甲
辰諭木蘭行圍爲秋獮大典我朝 家法昭垂舉行已久所以習
勞肆武款洽外藩况行圍不過十餘日仍照常辦事看本非若前
代之盤遊畋獵可比若以行圍爲從事遊觀則朕駐蹕圓明園如
附近之清漪園明靜宜各園較之避暑山莊更爲清愜人情好逸
惡勞孰不樂深居簡出朕特因典禮所關 祖 宗成憲具在不
敢自朕而稍形怠曠是以本年春閒卽降旨舉行秋獮乃汪承霈

於前日召見時面奏順天府屬雇車掣肘咨商直隸總督協濟車輛已露爲難之意昨又具摺奏請停止行圍據稱本年麥收分數稍減民力不無拮据並稱 高宗純皇帝臨御六年始舉秋獵今親政甫及四年卽再緩一二年舉行亦不爲遲等語殊不成話向來蹕路所經除道成梁等事均有例給經費從無累及閭閻之事此次直隸麥收據熊枚奏稱通省奪算實有七分不爲歉薄若如汪承霈所言則必待十分豐收方可舉行秋獵乎上年偶因雨水威漲道路橋梁間多衝塌降旨停止此係非常潦災萬不得已之事豈可引爲常例賈幸辰期何以取信外藩諸部耶且摺內有本年春閒兩次謁陵差務已形詰繹之語尤屬紕繆豈有愛惜勞費並欲朕將春秋展謁大典亦因之疏曠乎至協濟車輛一節汪承霈面奏後當卽降旨詢問熊枚本日據熊枚覆奏此次順天府

應雇長車直隸各屬除照例向幫價四千兩外加增銀一千兩解交大宛兩縣就近雇備等語是順天府此次雇覓車輛直隸又增貼銀一千兩自不至辦理維艱而朕於應行裁減之處已飭所司大加刪減更可節省况從前順天府按例雇辦車輛本有舊定章程所有此次行圍應用車輛著順天府照例雇辦若實有礙難辦理之處著汪承霈等詳悉分晰據實覆奏儻經費不敷亦不妨奏明請旨毋得因循疲玩再有推諉○己酉德楞泰奏冒雨趕勦賊會賊股淹斃百逆樊人傑等並將樊人傑妻子弟姪全行殲斃餘匪埽蕩得旨獎賚晉封德楞泰三等候將軍賽沖阿等下部議敘賞提督長齡雲騎尉世職並予軍機大臣慶桂董誥戴衢亨及章京等優敘奏事處接報兵部遞報各官加級沿途驛遞查明獎賞○勒保奏殲賊首楊步青得旨獎賞○甲寅命劉權之德瑛軍

機處行走○乙卯額勒登保奏奪爵首逆苟文明家屬開復革職
留任處分○禮部尙書達椿卒賜祭葬擢其子太僕寺少卿薩彬
圖爲內閣學士○以長麟爲禮部尙書調那彥寶爲兵部右侍郎
轉蘇楞額爲工部左侍郎以吉齡爲工部右侍郎由內閣學士遷○辛酉

改安徽池州府江防同知爲潁州府督捕同知移駐阜陽縣以池
州府管糧通判兼捕務○癸亥諭內閣爲絲綸重地大學士均應
常川到閣閱看本章其中有在軍機處行走者每年春夏在圓明
園之日居多散直後勢難再令赴閣視事至在城之日偶值樞務
稍簡朕仍令其赴衙門辦事卽應閣部兼到若不在內廷行走之
大學士則票擬綸音是其專責豈可稍涉閒曠是以保甯到京後
雖兼領侍衛內大臣朕不令其在園居住以便赴閣辦公無曠職
守嗣後軍機處行走之大學士值朕進城諭令到衙門辦事時著

先赴內閣再赴兼管之部院衙門其不在內廷行走大學士俱著常川到閣閱本以重綸扉而符體制○甲子諭軍機大臣等琅玕奏馳抵劍川分兵進剿吉尾樹苗賊匪各據由一摺樹苗一路餘匪尙在該處山內藏匿經琅玕派令成文永明等帶兵搜剿焚燒賊寨沿途均有斬獲並將投順夷民分別安插自不難以次廓清其吉尾賊匪據稱最爲強橫且山路處處可通慮其逃入沿江一帶再有勾結琅玕見在駐紮劍川適中之地督率將弁上緊進攻絕其後路自應如此辦理此時獵匪疊經官兵緊剿雖間有乘械來投之人但夷性反覆靡常總須懾以兵威使該夷等眞心畏懼乞命投誠方可就事完結至恆乍納一犯勾結各處夷匪滋生事端尤爲兇頑可惡必須嚴擊懲辦斷不可任其漏網該逆見既逃至江外距琅玕駐兵處所不甚遼遠務當設法擒獲或曉諭夷眾

將恆乍綑早行縛獻以淨根株再搘內稱此次進兵帶同所集鄉
勇相機攻勦一節該處陸續調派兵數儘已足數勦辦何必又藉
鄉勇之力紛紛圍集轉多煩擾著現玆察看情形如見在軍營實
無須該鄉勇等在彼幫同出力卽速行撤回